

四庫全書

集部

欽定四庫全書

集部

西漢文紀卷七

詳校官庶吉士臣謝恭銘

主事銜臣徐以坤覆勘

覆校官博士臣劉光第

校對官中書臣葉蘭

謄錄監生臣鄧培善

欽定四庫全書

西漢文紀卷七

明 梅鼎祚 編

鼂錯

潁川人以文學為太常掌故錯為人峭直刻深景帝時為內史遷御史大夫七國反為爰

益所

諳殺

請教皇太子書

錯為太子舍人門大夫遷博士上書文帝上善之於是拜錯為

太子家令得幸

太子號曰智囊

人主所以尊顯功名揚于萬世之後者以知術數也故人主知所以臨制臣下而治其眾則羣臣畏服矣知所

以聽言受事則不欺蔽矣知所以安利萬民則海內必從矣知所以忠孝事上則臣子之行備矣此四者臣竊為皇太子急之人臣之議或曰皇太子亡以知事為也臣之愚誠以為不然竊觀上世之君不能奉其宗廟而劫殺於其臣者皆不知術數者也皇太子所讀書多矣而未深知術數者也不問書說也夫多誦而不知其說所謂勞苦而不為功臣竊觀皇太子材智高竒馭射伎藝過人絕遠然於術數未有所守者以陛下為心也竊

願陛下幸擇聖人之術可用今世者以賜皇太子因時使太子陳明於前唯陛下裁察

### 言兵事書

是時匈奴數寇邊文帝發兵禦之錯上書言兵事帝賜璽書寵答焉

臣聞漢興已來胡虜數入邊地小入則小利大入則大利高后時再入隴西攻城屠邑毆畧畜產其後復入隴西殺吏卒大寇盜竊聞戰勝之威民氣百倍敗兵之卒沒世不復自高后以來隴西三困於匈奴矣民氣破傷

亡有勝意今茲隴西之吏賴社稷之神靈奉陛下之明  
詔和輯士卒底厲其節起破傷之民以當乘勝之匈奴  
用少擊衆殺一王敗其衆而有大利非隴西之民有勇  
怯乃將吏之制巧拙異也故兵法曰有必勝之將無必  
勝之民繇此觀之安邊境立功名在于良將不可不擇  
也臣又聞用兵臨戰合刃之急者三一曰得地形二曰  
卒服習三曰器用利兵法曰丈五之溝漸車之水山林  
積石經川丘阜中木所在此步兵之地也車騎二不當

一土山丘陵曼衍相屬平原廣野此車騎之地也步兵  
十不當一平陵相遠川谷居間仰高臨下此弓弩之地  
也短兵百不當一兩陳相近平地淺中可前可後此長  
戟之地也劍楯三不當一萑葦竹蕭中木蒙籠支葉茂  
接此矛鋌之地也長戟二不當一曲道相伏險阨相薄  
此劍楯之地也弓弩三不當一士不選練卒不服習起  
居不精動靜不集趨利弗及避難不畢前擊後解與金  
鼓之音相失此不習勒卒之過也百不當十兵不完利

與空手同甲不堅密與袒裼同弩不可以及遠與短兵同射不能中與亡矢同中不能入與亡鏃同此將不省兵之禍也五不當一故兵法曰器械不利以其卒予敵也卒不可用以其將予敵也將不知兵以其主予敵也君不擇將以其國予敵也四者兵之至要也臣又聞大小異形強弱異執險易異備夫卑身以事強小國之形也合小以攻大敵國之形也以蠻夷攻蠻夷中國之形也今匈奴地形技藝與中國異上下山阪出入溪澗中



國之馬弗與也險道傾仄且馳且射中國之騎弗與也  
風雨罷勞飢渴不困中國之人弗與也此匈奴之長技  
也若夫平原易地輕車突騎則匈奴之衆易撓亂也勁  
弩長戟射疏及遠則匈奴之弓弗能格也堅甲利刃長  
短相雜遊弩往來什伍俱前則匈奴之兵弗能當也材  
官騶發矢道同的則匈奴之革筈木薦弗能支也下馬  
地鬪劍戟相接去就相薄則匈奴之足弗能給也此中  
國之長技也以此觀之匈奴之長技三中國之長技五

陸下又興數十萬之衆以誅數萬之匈奴衆寡之計以一擊十之術也雖然兵凶器戰危事也以大為小以強為弱在倂仰之間耳夫以人之死爭勝跌而不振則悔之亡及也帝王之道出於萬全今降胡義渠蠻夷之屬來歸誼者其衆數千飲食長技與匈奴同可賜之堅甲絮衣勁弓利矢益以邊郡之良騎令明將能知其習俗和輯其心者以陛下之明約將之即有險阻以此當之平地通道則以輕車材官制之兩軍相為表裏各用其

長技衡加之以衆此萬全之術也傳曰狂夫之言而明  
主擇焉臣錯愚陋昧死上狂言唯陛下財擇

文帝答鼂錯璽書

皇帝問太子家令上書言兵體三章聞之書言狂夫之  
言而明主擇焉今則不然言者不狂而擇者不明國之  
大患故在於此使夫不明擇於不狂是以萬聽而萬不  
當也

復言守邊備塞勸農力本當世急務二事

臣聞秦時北攻胡貉築塞河上南攻揚粵置戍卒焉其起兵而攻胡粵者非以衛邊地而救民死也貪戾而欲廣大也故功未立而天下亂且夫起兵而不知其執戰則為人禽屯則卒積死夫胡貉之地積陰之處也木皮三寸冰厚六尺食肉而飲酪其人密理鳥獸毳毛其性能寒揚粵之地少陰多陽其人疏理鳥獸希毛其性能暑秦之戍卒不能其水土戍者死于邊輸者償于道秦民見行如往棄市因以謫發之名曰謫戍先發吏有謫

及贅壻賈人後以嘗有市籍者又後以大父母父母嘗  
有市籍者後入閭取其左發之不順行者深恐有背畔  
之心凡民守戰至死而不降北者以計為之也故戰勝  
守固則有拜爵之賞攻城屠邑則得其財鹵以富家室  
故能使其衆蒙矢石赴湯火視死如生今秦之發卒也  
有萬死之害而亡銖兩之報死事之後不得一筭之復  
天下明知禍烈及已也陳勝行戍至于大澤為天下先  
倡天下從之如流水者秦以威劫而行之之敝也胡人

衣食之業不著於地其執易以擾亂邊境何以明之胡人食肉飲酪衣皮毛非有城郭田宅之歸居如飛鳥走獸於廣墜美草甘水則止草盡水竭則移以是觀之往來轉徙時至時去此胡人之生業而中國之所以離南晦也今使胡人數處轉牧行獵于塞下或當燕代或當上郡北地隴西以候備塞之卒卒少則入陛下不救則邊民絕望而有降敵之心救之少發則不足多發遠縣纔至則胡又已去聚而不罷為費甚大罷之則復入如

此連年則中國貧苦而民不安矣陛下幸憂邊境遣將  
吏發卒以治塞甚大惠也然今遠方之卒守塞一歲而  
更不知胡人之能不如選常居者家室田作且以備之  
以便為之高城深塹具藺石布渠答復為一城其內城  
間百五十步要害之處通川之道調立城邑毋下千家  
為中周虎落先為室屋具田器乃募羣人及免徒復作  
令居之不足募以丁奴婢贖罪及輸奴婢欲以拜爵者  
不足乃募民之欲往者皆賜高爵復其家予冬夏衣廩

食能自給而止郡縣之民得買其爵以自增至卿其亡夫若妻者縣官買予之人情非有匹敵不能久安其處塞下之民祿利不厚不可使久居危難之地胡人入驅而能止其所驅者以其半予之縣官為贖其民如是則邑里相救助赴胡不避死非以德上也欲全親戚而利其財也此與東方之戍卒不習地勢而心畏胡者功相萬也以陛下之時徙民實邊使遠方亡屯戍之事塞下之民父子相保亡係虜之患利施後世名稱聖明其與



秦之行怨民相去遠矣

復言募民徙塞下事

文帝從錯言募民徙塞下錯復言徙塞下事

陛下幸募民相徙以實塞下使屯戍之事益省輸將之費益寡甚大惠也下吏誠能稱厚惠奉明法存卹所徙之老弱善遇其壯士和輯其心而勿侵刻使先至者安樂而不思故鄉則貧民相募而勸往矣臣聞古之徙遠方以實廣虛也相其陰陽之和嘗其水泉之味審其土地之宜觀其中木之饒然後營邑立城制里割宅通田

作之道正阡陌之界先為築室家有一堂二內門戶之  
閑置器物焉民至有所居作有所用此民所以輕去故  
鄉而勸之新邑也為置醫巫以救疾病以修祭祀男女  
有昏生死相郵墳墓相從種樹畜長室屋完安此所以  
使民樂其處而有長居之心也臣入聞古之制邊縣以  
備敵也使五家為伍伍有長十長一里里有假士四里  
一連連有假五百十連一邑邑有假候皆擇其邑之賢  
材有護習地形知民心者居則習民於射法出則教民

於應敵故卒伍成于內則軍政定于外服習以成勿令  
遷徙幼則同遊長則共事夜戰聲相知則足以相救晝  
戰目相見則足以相識謹愛之心足以相死如此而勸  
以厚賞威以重罰則前死不還踵矣所徙之民非壯有  
材力但費衣糧不可用也雖有材力不得良吏猶亡功  
也陛下絕匈奴不與和親臣竊意其冬來南也壹大治  
則終身創矣欲立威者始於折膠來而不能困使得氣  
去後未易服也愚臣亡識唯陛下財察

說文帝貴粟奏

文帝感賈誼言始開籍田躬耕以勸百姓錯復說上以粟贖罪

拜爵帝從其言令民入粟邊六百石爵上造稍增至四千石為五大夫萬二千石為大庶

長各以多少級數為差錯復奏言入粟免租乃詔除民田租稅

聖王在上而民不凍飢者非能耕而食之織而衣之也  
為開其資財之道也故堯禹有九年之水湯有七年之  
旱而國亡捐瘠者以畜積多而備先具也今海內為一  
土地人民之衆不避湯禹加以亡天災數年之水旱而  
畜積未及者何也地有餘利民有餘力生穀之土未盡

墾山澤之利未盡出也游食之民未盡歸農也民貧則  
姦邪生貧生于不足不足生于不農不農則不地著不  
地著則離鄉輕家民如鳥獸雖有高城深池嚴法重刑  
猶不能禁也夫寒之於衣不待輕煖飢之于食不待甘  
旨飢寒至身不顧廉恥人情一日不再食則飢終歲不  
製衣則寒夫腹飢不得食膚寒不得衣雖慈母不能保  
其子君安能以有其民哉明主知其然也故務民於農  
桑薄賦斂廣畜積以實倉廩備水旱故民可得而有也

民者在上所以收之趨利如水走下四方亡擇也夫珠  
玉金銀飢不可食寒不可衣然而衆貴之者以上用之  
故也其為物輕微易滅在于把握可以周海內而亡飢  
寒之患此令臣輕背其主而民易去其鄉盜賊有所勸  
亡逃者得輕資也粟米布帛生于地長于時聚于力非  
可一日成也數石之重中人弗勝不為奸邪所利一日  
弗得而飢寒至是故明君貴五穀而賤金玉今農夫五  
口之家其服役者不下二人其能耕者不過百畝百畝

之收不過百石春耕夏耘秋穫冬臧伐薪樵治官府給  
繇役春不得避風塵夏不得避暑熱秋不得避陰雨冬  
不得避寒凍四時之間無日休息又私自送往迎來弔  
死問疾養孤長幼在其中勤苦如此尚復被水旱之災  
急政暴虐賦歛不時朝令而暮改當具有者半賣而賣  
亡者取倍稱之息於是有賣田宅鬻子孫以償責者矣  
而商賈大者積貯倍息小者坐列販賣操其奇贏日游  
都市乘上之急所賣必倍故其男不耕耘女不蠶織衣

必文采食必梁肉亡農夫之苦有仟伯之得因其富厚  
交通王侯力過吏執以利相傾千里游敖冠蓋相望乘  
堅策肥履絲曳縞此商人所以兼并農人農人所以流  
亡者也今法律賤商人商人已富貴矣尊農夫農夫已  
貧賤矣故俗之所貴主之所賤也吏之所卑法之所尊  
也上下相反好惡乖迕而欲國富法立不可得也方今  
之務莫若使民務農而已矣欲民務農在于貴粟貴粟  
之道在于使民以粟為賞罰今募天下入粟縣官得以



拜爵得以除罪如此富人  
有爵農民有錢粟有所  
潔夫能入粟以受爵  
皆有餘者也取於有餘  
以供上用則貧民之賦  
可損所謂損有餘補不  
足令出而民利者也順  
于民心所補者三一曰  
主用足二曰民賦少三  
曰勸農功今令民有車  
騎馬一匹者復卒三人  
車騎者天下武備也故  
為復卒神農之教曰有  
石城十仞湯池百步帶  
甲百萬而亡粟弗能守  
也以是觀之粟者王者  
大用政之本務令民入  
粟受爵至五大夫以上  
乃復一人耳此

其與騎馬之功相去遠矣爵者上之所擅出于口而無窮粟者民之所種生于地而不乏夫得高爵與免罪人之所甚欲也使天下人入粟於邊以受爵免罪不過三歲塞下之粟必多矣

入粟免租奏

陛下幸使天下入粟塞下以拜爵其大惠也竊恐塞卒之食不足用大滯天下粟邊食足以支五歲可令入粟郡縣矣足支一歲以上可時赦勿收農民租如此德澤

加于萬民民俞勤農時有軍役若遭水旱民不困乏天下安寧歲孰且美則民大富樂矣

賢良策

文帝十五年詔有司察舉賢良文學士錯在選中上親策之時賈誼已死對奏

者百餘人唯錯為高第由是遷中大夫

文帝賢良策制

惟十有五年九月壬子皇帝曰昔者大禹勤求賢士施及方外四極之內舟車所至人迹所及靡不聞命以輔其不逮近者獻其明遠者通厥聰比善勗力以翼天子

是以大禹能亡失德夏以長楸高皇帝親除大害去亂  
從並建豪英以為官師為諫諍輔天子之闕而翼戴漢  
宗也賴天之靈宗廟之福方內以安澤及四夷今朕獲  
執天子之正以承宗廟之祀朕既不德又不敏明弗能  
燭而智不能治此大夫之所著聞也故詔有司諸侯王  
三公九卿及主郡吏各帥其志以選賢良明于國家之  
大體通於人事之終始及能直言極諫者各有人數將  
以匡朕之不逮二三大夫之行當此三道朕甚嘉之故

登大夫於朝親諭朕志大夫其上三道之要及永惟朕之不德吏之不平政之不宣民之不寧四者之闕悉陳其志毋有所隱上以薦先帝之宗廟下以興愚民之休利著之於篇朕親覽焉觀大夫所以佐朕至與不至書之周之密之重之閉之興自朕躬大夫其正論毋枉執事烏虜戒之二三大夫其帥志毋怠

平陽侯臣窋汝陰侯臣竈潁陰侯臣何廷尉臣宜昌隴西太守臣昆邪所選賢良太子家令臣錯昧死再拜言

臣竊聞古之賢主莫不求賢以為輔翼故黃帝得力牧而為五帝先大禹得咎繇而為三王祖齊桓得管子而為五伯長今陛下講于大禹及高皇帝之建豪英也退託於不明以求賢良讓之至也臣竊觀上世之傳若高皇帝之建功業陛下之德厚而得賢佐皆有司之所覽刻于玉版歲于金匱歷之春秋紀之後世為帝者祖宗與天地相終今臣竄等乃以臣錯充賦甚不稱明詔求賢之意臣錯草茅臣亡識知昧死上愚對曰詔策曰明

於國家大體愚臣竊以古之五帝明之臣聞五帝神聖其臣莫能及故自親事處于法宮之中明堂之上動靜上配天下順地中得人故衆生之類亡不覆也根著之徒亡不載也燭以光明亡偏異也德上及飛鳥下至水蟲草木諸產皆被其澤然後陰陽調四時節日月光風雨時膏露降五穀熟祆孽滅賊氣息民不疾疫河出圖洛出書神龍至鳳鳥翔德澤滿天下靈光施四海此謂配天地治國大體之功也詔策曰通於人事終始愚臣

竊以古之三王明之臣聞三王臣主俱賢故合謀相輔  
計安天下莫不本于人情人情莫不欲壽三王生而不  
傷也人情莫不欲富三王厚而不困也人情莫不欲安  
三王扶而不危也人情莫不欲逸三王節其力而不盡  
也其為法令也合于人情而後行之其動衆使民也本  
于人事然後為之取人以已內恕及人情之所惡不以  
彊人情之所欲不以禁民是以天下樂其政歸其德望  
之若父母從之若流水百姓和親國家安寧名位不失



施及後世此明于人情終始之功也詔策曰直言極諫  
愚臣竊以五伯之臣明之臣聞五伯不及其臣故屬之  
以國任之以事五伯之佐之為人臣也察身而不敢誣  
奉法令不容私盡心力不敢矜遭患難不避死見賢不  
居其上受祿不過其量不以亡能居尊顯之位自行若  
此可謂方正之士矣其立法也非以苦民傷衆而為之  
機陷也以之興利除害尊主安民而救暴亂也其行賞  
也非虛取民財妄予人也以勸天下之忠孝而明其功

也故功多者賞厚功少者賞薄如此斂民財以顧其功而民不恨者知與而安已也其行罰也非以忿怒妄誅而從暴心也以禁天下不忠不孝而害國者也故臯大者罰重臯小者罰輕如此民雖伏臯至死而不怨者知臯罰之至自取之也立法若此可謂平正之吏矣法之逆者請而更之不以傷民主行之暴者逆而復之不以傷國救主之失補主之過揚主之美明主之功使主內亡邪辟之行外亡寯汚之名事君若此可謂直言極諫

之士矣此五伯之所以德匡天下威振諸侯功業甚美  
名聲章明舉天下之賢王五伯與焉此身不及其臣而  
使得直言極諫補其不逮之功也今陛下人民之衆威  
武之重德惠之厚令行禁止之勢萬萬於五伯而賜愚  
臣策曰匡朕之不逮愚臣何足以識陛下之高明而奉  
承之詔策曰吏之不平政之不宣民之不寧愚臣竊以  
秦事明之臣聞秦始并天下之時其主不及三王而臣  
不及其佐然功力不遲者何也地形便山川利財用足

民利戰其所與並者六國六國者臣主皆不肖謀不輯  
民不用故當此之時秦最富彊夫國富彊而鄰國亂者  
帝王之資也故秦能兼六國立為天子當此之時三王  
之功不能進焉及其末塗之衰也任不肖而信讒賊宮  
室過度者慾亡極民力罷盡賦斂不節矜奮自賢羣臣  
恐諛驕溢縱恣不顧患禍妄賞以隨喜意妄誅以快怒  
心法令煩憊刑罰暴酷輕絕人命身自射殺天下寒心  
莫安其處姦邪之利乘其亂法以成其威獄官主斷生

殺自恣上下瓦解各自為制秦始亂之時吏之所先侵者貧人賤民也至其中節所侵者富人吏家也及其末塗所侵者宗室大臣也是故親疏皆危外內咸怨離散逋逃人有走心陳勝先倡天下大潰絕祀亡世為異姓福此吏不平政不宣民不寧之禍也今陛下配天象地覆露萬民絕秦之迹除其亂法躬親本事廢去淫末除苛解媿寬大愛人肉刑不用臯人亡帑非謗不治鑄錢者除通關去塞不孽諸侯賓禮長老愛卹少孤臯人有

期後宮出嫁尊賜孝悌農民不租明詔軍師愛士大夫  
求進方正廢退姦邪除去陰刑害民者誅憂勞百姓列  
侯就都親耕節用視民不奢所為天下興利除害變法  
易故以安海內者大功數十皆上世之所難及陛下行  
之道純德厚元元之民幸矣詔策曰永惟朕之不德愚  
臣不足以當之詔策曰悉陳其志毋有所隱愚臣竊以  
五帝之賢臣明之臣聞五帝其臣莫能及則自親之三  
王臣主俱賢則共憂之五伯不及其臣則任使之此所

以神明不遺而賢聖不廢也故各當其世而立功德焉  
傳曰往者不可及來者猶可待能明其世者謂之天子  
此之謂也竊聞戰不勝者易其地民貧窮者變其業今  
以陛下神明德厚資財不下五帝臨制天下至今十有  
六年民不益富盜賊不衰邊境未安其所以然意者陛  
下未之躬親而待羣臣也今執事之臣皆天下之選已  
然莫能望陛下清光之猶五帝之佐也陛下不自躬  
親而待不望清光之臣臣竊恐神明之遺也日損一日

歲亡一歲日月益暮盛德不及究於天下以傳萬世愚  
臣不自度量竊為陛下惜之味死上狂惑少茅之愚臣  
言唯陛下財擇

說景帝削吳

錯文帝時數上書言吳過可削帝不忍以此吳王濞日益橫景帝即

位錯為御史大夫說上三年楚趙以過削郡縣廷臣方議削吳與楚七國俱反

昔高帝初定天下昆弟少諸子弱大封同姓故孽子悼  
惠王王齊七十二城庶弟元王王楚四十城兄子王吳  
五十餘城封三庶孽分天下半今吳王前有太子之隙



詐稱病不朝於古法當誅文帝不忍因賜几杖德至厚也不改過自新乃益驕恣公即山鑄錢煮海為鹽誘天下二人謀作亂逆今削之亦反不削亦反削之其反亟禍小不削之其反遲禍大

陶青

作嚴青翟誤辨見後史記  
莊青翟本姓莊以漢明諱改

劾黷錯奏

景帝時錯遷為御史大夫更定法令  
侵削諸侯及吳楚七國反以誅錯為

名錯欲令上自將兵而身居守會爰盎入言  
上計獨斬錯赦七國復其故地則兵可罷于  
是丞相青翟中尉嘉廷尉歐劾奏錯要斬制  
可  
按景帝紀元年遣御史大夫青翟與匈奴

奴和親文預注曰姓嚴諱青翟臣瓚曰此陶青也莊青翟乃自武帝時人此紀誤師古曰後人傳習不曉妄增翟字耳鼎又按史記漢書二表孝景二年陶青為丞相三年正月罷錯有罪要斬則劾奏錯者正陶青其誤與紀同而錯傳注未及辨青翟以孝武元狩五年始為丞相元鼎二年坐張湯自殺此何得云青翟也

吳王反逆亡道欲危宗廟天下所當共誅今御史大夫錯議曰兵數百萬獨屬羣臣不可信陛下不如自出臨兵使錯居守徐僮之旁吳所未下者可以予吳錯不稱陛下德信欲疏羣臣百姓又欲以城邑予吳亡臣子禮

大逆亡道錯當要斬父母妻子同產亡少長皆棄市臣  
請論如法

鄒陽

齊人吳王濞招致四方名士陽與吳  
嚴忌枚乘等俱仕皆以文辯著名

諫吳王濞書

吳王以太子事怨望陰有邪謀陽上書以事  
尚隱故先引秦為喻因道諸國之難王不內

臣聞秦倚曲臺之宮懸衡天下畫地而不犯兵加胡越  
至其晚節末路張耳陳勝連從兵之據以叩函谷咸陽  
遂危何則列郡不相親萬室不相救也今胡數涉北河

之外上覆飛鳥下不見伏菟闕城不休救兵不止死者  
相隨輦車相屬轉粟流輸千里不絕何則強趙責于河  
間六齊望于惠后城陽顧于盧博三淮南之心思墳墓  
大王不憂臣恐救兵之不專胡馬遂進窺於邯鄲越水  
長沙還舟青陽雖使梁并淮陽之兵下淮東越廣陵以  
遏越人之糧漢亦折西河而下北守漳水以輔大國胡  
亦益進越亦益深此臣之所為大王患也臣聞交龍襄  
首奮翼則浮雲出流霧雨咸集聖王底節修德則游談

之士歸義思名今臣盡智畢議易精極慮則無國不可  
奸飾固陋之心則何王之門不可曳長裾乎然臣所以  
歷數王之朝背淮千里而自致者非惡臣國而樂吳民  
也竊高下風之行尤說大王之義故願大王之無忽察  
聽其志臣聞鷙鳥累百不如一鶚夫全趙之時武力鼎  
士衽服叢臺之下者一旦成市而不能止幽王之湛患  
淮南連山東之俠死士盈朝不能還厲王之西也然而  
計議不得雖諸賁不能安其位亦明矣故願大王審畫

而已始孝文皇帝據關入立寒心銷志不明求衣自立  
天子之後使東牟朱虛東褒義父之後深割嬰兒王之  
壤子王梁代益以淮陽卒仆濟北囚弟於雍者豈非象  
新垣平等哉今天子新據先帝之遺業左規山東右制  
關中變權易執大臣難知大王弗察臣恐周鼎復起於  
漢新垣過計於朝則我吳遺嗣不可期於世矣高皇帝  
燒棧道水章邯兵不留行收弊民之倦東馳函谷西楚  
大破水攻則章邯以亡其城陸擊則荆王以失其地此

皆國家之幾者也願大王熟察之

漢書 不犯文選作人不犯不止作不至

無國不可奸作無國而不可干志一作至水一作灌

黃震曰本未免戰國諸游士之餘習能持正論可嘉 唐

順之曰此文辭極微 陽知吳王陰結連齊趙淮南胡

越故先言趙齊城陽淮南諸國各有私怨欲申其志不

肯專為吳時趙王遂北連匈奴吳王漢素事三越故

又言漢昏有以待之胡越亦自受敵救兵之不專也

### 獄中上梁孝王武書

武文帝次子初封淮陽

鄒陽枚乘嚴忌知吳不可說皆去之梁從孝

王游陽慷慨不苟合羊勝公孫詭疾陽惡之

孝王下陽吏將殺之陽容游以讒見禽恐死

而負索從獄中上書王使人出之卒為上客

臣聞忠無不報信不見疑臣常以為然徒虛語耳昔者

荆軻慕燕丹之義白虹貫日太子畏之衛先生為秦畫  
長平之事太白蝕昴而昭王疑之夫精變天地而信不  
喻兩主豈不哀哉今臣盡忠竭誠畢議願知左右不明  
卒從吏訊為世所疑是使荆軻衛先生復起而燕秦不  
悟也願大王孰察之昔卞和獻寶楚王削之李斯竭忠  
胡亥極刑是以箕子佯狂接輿辟世恐遭此患也願大  
王孰察卞和李斯之意而後楚王胡亥之聽無使臣為  
箕子接輿所笑臣聞比干剖心子胥鴟夷臣始不信乃



今知之願大王孰察少加憐焉諺曰有白頭如新傾蓋如故何則知與不知也故昔樊於期逃秦之燕藉荊軻首以奉丹之事王奢去齊之魏臨城自剄以却齊而存魏夫王奢樊於期非新于齊秦而故于燕魏也所以去二國死兩君者行合于志而慕義無窮也是以蘇秦不信于天下而為燕尾生白圭戰亡六城為魏取中山何則誠有以相知也蘇秦相燕燕人惡之於王王按劍而怒食以馭馭白圭顯于中山中山人惡之魏文侯文侯

投之以夜光之璧何則兩主二臣剖心折肝相信豈移  
于浮辭哉故女無美惡入宮見妬士無賢不肖入朝見  
嫉昔者司馬喜贖脚於宋宰相中山范曄摺脅折齒於  
魏卒為應侯此二人者皆信必然之畫捐朋黨之私挾  
孤獨之位故不能自免於嫉妬之人也是以申徒狄自  
沈于河徐衍負石入海不容於世義不苟取比周於朝  
以移主上之心故百里奚乞食於路繆公委之以政甯  
戚飯牛車下而桓公任之以國此二人者豈借宦于朝

假譽于左右然後二主用之哉感于心合于行親于膠漆昆弟不能離豈惑于衆口哉故偏聽生姦獨任成亂昔者魯聽季孫之說而逐孔子宋聽子罕之計而囚墨翟夫以孔墨之辨不能自免于讒諛而二國以危何則衆口鑠金積毀銷骨也是以秦用戎人由余而霸中國齊用越人蒙而強威宣此二國豈拘於俗牽於世繫阿偏之辭哉公聽並觀垂名當世故意合則胡越為昆弟由余越人蒙是矣不合則骨肉出逐不收朱象管蔡是

矣今人主誠能用齊秦之義後宋魯之聽則五伯不足稱三王易為也是以聖王覺寤捐子之心而能不說于田常之賢封比干之後脩孕婦之墓故功業復就於天下何則欲善無厭也夫晉文公親其讎強霸諸侯齊桓公用其仇而一匡天下何則慈仁慤誠加于心不可以虛辭借也至夫秦用商鞅之法東弱韓魏兵強天下而卒車裂之越用大夫種之謀禽勁吳伯中國而卒誅其身是以孫叔敖三去相而不悔於陵子仲辭三公

為人灌園今人主誠能去驕傲之心懷可報之意披心  
腹見情素墮肝膽施德厚終與之窮達無愛於士則桀  
之狗可使吠堯而蹠之客可使刺由況因萬乘之權假  
聖王之資乎然則荆軻之湛七族要離之燒妻子豈足  
道哉臣聞明月之珠夜光之璧以闇投人於道路人無  
不按劍相眇者何則無因而至前也蟠木根抵輪囷離  
詭而為萬乘器者何則以左右先為之容也故無因至  
前雖出隋侯之珠夜光之璧尤結怨而不見德故有人

先談則以枯木朽株樹功而不忘今夫天下布衣窮居之士身在貧賤雖包堯舜之術挾伊管之辯懷龍逢比干之意欲盡忠當世之君而素無根柢之容雖竭精思欲開忠信輔人主之治則人主必有按劍相眄之跡是使布衣不得為枯木朽株之資也是以聖王制世御俗獨化於陶鈞之上而不牽于卑亂之語不奪于衆多之口故秦皇帝任中庶子蒙嘉之言以信荆軻之說而匕首竊發周文王獵涇渭載呂尚而歸以王天下故秦信

左右而殺周用烏集而王何則以其能越拘攣之語馳  
域外之議獨觀於昭曠之道也今人主沈於諂諛之辭  
牽於帷裳之制使不羈之士與牛驥同皁此鮑焦所以  
忿於世而不留富貴之樂也臣聞盛飾入朝者不以利  
汙義砥礪名號者不以欲傷行故縣名勝母而曾子不  
入邑號朝歌而墨子迴車今欲使天下寥廓之士攝于  
威重之權主于位勢之貴故回面汙行以事諂諛之人  
而求親近於左右則士伏死掘穴巖巖之中耳安肯有

盡忠信而趨闕下者哉

史記如故作而新而故入宮作居宮

所笑劉向作所歎如新

蹈雍作蹈流借宦作藉官囚墨翟作逐墨翟人主作世主窮達作窮通狗作犬是使士不得為作不得當蒙嘉

作蒙恬而殺作而殺盡忠信作盡精神太史公曰鄒陽辭雖不遜然其比物連類有足悲者亦可謂抗直不

撓矣真德秀曰此篇用事太多文亦侵趨於偶儷然其論讒毀之禍至痛切可為世戒焉徐中行曰鄒陽

書前實後虛韓非說難前虛後實此級文之妙所以冠絕古今

同前漢書

臣聞忠無不報信不見疑臣常以為然徒虛語耳昔荆軻慕燕丹之義白虹貫日太子畏之衛先生為秦畫長



平之事太白食昂昭王疑之夫精變天地而信不論兩  
主豈不哀哉今臣盡忠竭誠畢議願知左右不明卒從  
吏訊為世所疑是使荆軻衛先生復起而燕秦不寤也  
願大王孰察之昔玉人獻寶楚王誅之李斯竭忠胡亥  
極刑是以箕子佯狂接輿避世恐遭此患也願大王察  
玉人李斯之意而後楚王胡亥之聽毋使臣為箕子接  
輿所笑臣聞比干剖心子胥鴟夷臣始不信乃今知之  
願大王孰察少加憐焉語曰有白頭如新傾蓋如故何

則知與不知也故樊於期逃秦之燕藉荊軻首以奉丹  
事王奢去齊之魏臨城自剄以卻齊而存魏夫王奢樊  
於期非新于齊秦而故于燕魏也所以去二國死兩君  
者行合於志慕義無窮也是以蘇秦不信于天下為燕  
尾生白圭戰亡六城為魏取中山何則誠有以相知也  
蘇秦相燕人惡之燕王燕王按劍而怒食以馱馱白圭  
顯于中山人惡之於魏文侯文侯賜以夜光之璧何則  
兩主二臣剖心折肝相信豈移於浮辭哉故女無美惡

入宮見妒士無賢不肯入朝見嫉昔司馬喜臙脚於宋  
宰相中山范曄摺脅折齒於魏卒為應侯此二人者皆  
信必然之畫捐朋黨之私挾獨孤之交故不能自免於  
嫉妒之人也是以申屠狄蹈雍之河徐衍負石入海不  
容于世義不苟取比周于朝以移主上之心故百里奚  
乞食於道路繆公委之以政甯戚飯牛車下桓公任之  
以國此二人者宜素宦于朝借譽于左右然後二主用  
之哉感于心合于行堅如膠漆昆弟不能離宜惑于衆

口哉故偏聽生姦獨任成亂昔魯聽季孫之說逐孔子  
宋任子冉之計囚墨翟夫以孔墨之辯不能自免于讒  
諛而二國以危何則衆口鑠金積毀銷骨也秦用戎人  
由余而伯中國齊用越人子臧而強威宣此二國豈係  
于俗牽于世繫竒偏之浮辭哉公聽並觀垂名當世故  
意合則胡越為兄弟由余子臧是矣不合則骨肉為讎  
敵朱象管蔡是矣今人主誠能用齊秦之明後魯宋之  
聽則五伯不足侔而三王易為也是以聖王覺寤捐子

之心而不說田常之賢封比干之後修孕婦之墓故  
功業覆于天下何則欲善亡厭也夫晉文親其讎強伯  
諸侯齊桓用其仇而一匡天下何則慈仁殷勤誠加於  
心不可以虛辭借也至夫秦用商鞅之法東弱韓魏力  
彊天下卒車裂之越用大夫種之謀禽勁吳而伯中國  
遂誅其身是以孫叔敖三去相而不悔於陵子仲辭三  
公為人灌園今人主誠能去驕傲之心懷可報之意披  
心腹見情素墮肝膽施德厚終與之窮達無愛於士則

桀之犬可使吠堯跖之客可使刺由何況因萬乘之權  
假聖王之資乎然荆軻湛七族要離燔妻子豈足為大  
王道哉臣聞明月之珠夜光之璧以闇投人於道衆莫  
不按劍相眄者何則無因而至前也蟠木根抵輪囷離  
竒而為萬乘器者以左右先為之容也故無因而至前  
雖出隋珠和璧祇怨結而不見德有人先游則枯木朽  
株樹功而不忘今夫天下布衣窮居之士身在貧羸雖  
蒙堯舜之術挾伊管之辨懷龍逢比干之意而素無根

抵之容雖竭精神欲開忠於當世之君則人主必襲按  
劍相眄之迹矣是使布衣之士不得為枯木朽株之資  
也是以聖王制世御俗獨化於陶鈞之上而不牽乎卑  
亂之語不奪乎衆多之口故秦皇帝任中庶子蒙之言  
以信荊軻而匕首竊發周文王獵涇渭載呂尚歸以王  
天下秦信左右而亡周用烏集而王何則以其能越牽  
拘之語馳域外之議獨觀虜昭曠之道也今人主沈諂  
諛之辭牽帷廡之制使不羈之士與牛驥同皁此鮑焦

所以憤于世也臣聞盛飾入朝者不以私汙義底厲名  
號者不以利傷行故里名勝母曾子不入邑號朝歌墨  
子回車今欲使天下廖廓之士籠於威重之權脅于位  
執之貴回面汙行以事諂諛之人而求親近於左右則  
士有伏死堀穴巖藪之中耳安有盡忠信而趨闕下者  
哉

同前

漢紀  
作疏

臣聞忠無不報信不見疑蓋有以然今定虛矣昔者荆



軻慕燕丹之義白虹貫日太子畏之衛先生為秦畫長  
平之策太白蝕昴昭王疑之夫精誠變於天地而信不  
喻于兩主豈不哀哉今臣盡忠畢義左右不明卒從吏  
訛為世所疑是使荆軻衛先生復出而燕秦不悟矣昔  
玉人獻寶楚王誅之李斯竭忠胡亥極刑是以箕子佯  
狂接輿避世恐遭此患也願大王察玉人李斯之意然  
後改楚王胡亥之聽無使臣為箕子接輿所笑夫偏聽  
生姦獨任成亂是以魯聽季孫之說而逐孔子宋信子

罕之計而囚墨翟夫以孔墨之辨不能自免于讒諛而  
二國以危者何則衆口爍金積毀銷骨臣聞明月之珠  
夜光之璧以闇投之人莫不按劍而怒何則無因而至  
前也蠹木根柢輪囷離竒而為萬乘之器者以左右先  
為之容也故女無美惡入宮見妒士無賢愚入朝見嫉  
昔司馬喜臙脚于宋宰相中山范睢折脅於魏卒為應  
侯此二人者信必然之畫捐朋黨之私挾孤特之交故  
不能自免于讒諛之人是以申徒狄蹈雍之河徐衍負

石入海皆不容于世義不苟取比周于朝百里奚乞食于路秦穆公授之以政甯戚飯牛車下齊桓公任之以國此二人者豈素宦于朝假譽于左右哉感于心合于行堅如膠漆衆口所不能離豈惑于浮辭哉是以聖主不牽于卑亂之語不奪于衆多之口獨化于陶鈞之上而觀乎昭曠之道臣聞盛飾入朝者不以私汙義砥礪名號者不以利傷行今欲使天下寥廓之士誘於威重之權脅於勢位之貴迴面汙行以事諂諛之人而求親

近於左右則士有伏死窟穴巖石之中耳安肯盡忠信而趣闕下者哉

枚乘

字叔淮陰人游吳與梁景帝台拜弘農都尉以病去官復游梁及武帝以安車蒲輪徵乘

道死

諫吳王漢書

乘為漢郎中吳王之初怨望謀為逆也乘奏書諫之吳王不納乘去而之梁

臣聞得全者全昌失全者全亡舜無立錫之地以有天  
下禹無十戶之聚以王諸侯湯武之土不過百理上不

絕三光之明下不傷百姓之心者有王術也故父子之  
道天性也忠臣不避重誅以直諫則事無遺策功流萬  
世臣乘願披腹心而效愚忠唯大王少加意念惻怛之  
心於臣乘言夫以一縷之任係千鈞之重上縣無極之  
高下垂不測之淵雖甚愚之人猶知哀其將絕也馬方  
駭鼓而驚之係方絕又重鎮之係絕于天不可復結隊  
入深淵難以復出其出不出間不容髮能聽忠臣之言  
百舉必脫必若所欲為危于繫卵難于上天變所欲為

易于反掌安于泰山今欲極天命之壽敝無窮之樂究  
萬乘之執不出反掌之易以居泰山之安而欲乘象卵  
之危走上天之難此愚臣之所以為大王或也人性有  
畏其景而惡其跡者卻背而走迹愈多景愈疾不知就  
陰而止景滅迹絕欲人勿聞莫若勿言欲人勿知莫若  
勿為欲湯之滄一人炊之百人揚之無益也不如絕薪  
止火而已不絕之於彼而救之於此譬猶抱薪而救火  
也養由基楚之善射者也去楊葉百步百發百中楊葉

之大加百中焉可謂善射矣然其所止乃百步之內耳  
比於臣乘未知操弓持矢也福生有基禍生有胎納其  
基絕其胎禍何自來泰山之雷穿石單極之統斷幹水  
非石之鑽索非木之鋸漸靡使之然也夫銖銖而稱之  
至石必差寸寸而度之至丈必過石稱大量徑而寡失  
夫十圍之木始生如蘖足可搔而絕手可擢而拔據其  
未生先其未形也磨礮底厲不見其損有時而盡種樹  
畜養不見其益有時而大積德彙行不知其善有時而

用棄義背理不知其惡有時而亡臣願大王孰計而身

行之此百世不易之道也

漢書班固贊曰鄒陽枚乘游于危國然卒免刑戮者以

其言正也

真德秀曰

磨礱數句此天下名言

故武王諤諤而昌紂嘿嘿而亡君無諤諤之臣父無

諤諤之子兄無諤諤之弟夫無諤諤之妻士無諤諤

之友其亡可待故曰君失之臣得之父失之子得之

兄失之弟得之夫失之婦得之士失之友得之故無

亡國破家恃父亂子放兄棄弟狂夫淫婦絕交敗友

者也太平御覽載諫吳王書譬猶抱薪而救火也

後有此

一段

同前說苑



孝景皇帝時吳王濞反梁孝王郎中枚乘  
字叔聞之為書諫王吳王不聽卒死丹徒

君王之外臣乘竊聞得全者全昌失全者全亡舜無立  
錐之地以有天下禹無十戶之聚以王諸侯湯武之地  
方不過百里上不絕三光之明下不傷百姓之心者有  
王術也故父子之道天性也忠臣不敢避誅以直諫故  
事無廢業而功流于萬世也臣誠願披腹心而効愚忠  
恐大王不能用之臣誠願大王少加意念惻怛之心於  
臣乘之言夫以一縷之任係千鈞之重上懸之無極之

高下垂之不測之淵雖甚愚之人且猶知哀其將絕也  
馬方駭而重驚之係方絕而重鎮之係絕于天不可復  
結墜入深淵難以復出其出不出間不容髮誠能用臣  
乘言一舉必脫必若所欲為危如重卵難於上天變所  
欲為易於反掌安于泰山今欲極天命之壽弊無窮之  
樂保萬乘之勢不出反掌之易以居太山之安乃欲乘  
重卵之危走上天之難此愚臣之所大惑也人性有畏  
其影而惡其迹者却背而走無益也不如就陰而止影

滅跡絕欲人勿聞莫若勿言欲人勿知莫若勿為欲湯  
之冷令一人炊之百人揚之無益也不如絕薪止火而  
已不絕之于彼而救之于此譬猶抱薪救火也養由基  
楚之善射者也去楊葉百步百發百中楊葉之小而加  
百中焉可謂善射矣所止乃百步之中耳比於臣未知  
操弓持矢也福生有基禍生有胎納其基絕其胎禍從  
何來哉泰山之溜穿石引繩久之乃以挈木水非石之  
鑽繩非木之鋸也而漸靡使之然夫銖銖而稱之至石

必差寸寸而度之至丈必過石稱丈量徑而寡失夫十圍之木始生於蘖可引而絕可擢而拔據其未生先其未形磨礮砥礪不見其損有時而盡種樹畜長不見其益有時而大德積修行不知其善有時而用行惡為非棄義背理不知其惡有時而亡臣誠願大王孰計而身行之此百王不易之道也

全昌全亡文選並無  
全字百王作百代

重諫吳王書

漢書作  
說吳王

鼂錯為御史大夫謀削諸王地吳王與諸國  
反以誅錯為名漢斬錯以謝諸王乘於是復

上書說王使罷兵吳王不用卒見  
禽滅漢既平七國乘由此知名

昔秦西舉胡戎之難北備榆中之關南距羌笮之塞東  
當六國之從六國乘信陵之籍明蘇秦之約厲荆軻之  
威并力一心以備秦然秦卒禽六國滅其社稷而并天  
下者何也則地利不同而民輕重不等也今漢據全秦  
之地兼六國之衆修戎狄之義而南朝羌笮此其與秦  
地相什而民相百大王之所明知也今夫讒諛之臣為  
大王計者不論骨肉之義民之輕重國之大小以為吳

禍此臣之所以為大王患也夫舉吳兵以訾于漢譬猶  
蠅蚋之附羣牛腐肉之齒利劒鋒接必無事矣天下聞  
吳率失職諸侯願責先帝之遺約今漢親誅其三公以  
謝前過是大王之威加于天下而功越于湯武也夫吳  
有諸侯之位而富實于天子有隱匿之名而居過于中  
國夫漢并二十四郡十七諸侯方輸錯出軍行數千里  
不絕于郊其珍怪不如山東之府轉粟西向陸行不絕  
水行滿河不如海陵之倉修治上林雜以離宮積聚玩

好園守禽獸不如長洲之苑游曲臺臨上路不如朝夕  
之池深壁高壘副以關城不如江淮之險此臣之所為  
大王樂也今大王還兵疾歸尚得十牛不然漢知吳有  
吞天下之心赫然加怒遣羽林黃頭循江而下襲大王  
之都魯東海絕吳之饗道梁王飾車騎習戰射積粟固  
守以備滎陽待吳之飢大王雖欲反都亦不得已夫三  
淮南之計不負其約齊王殺身以滅其迹四國不得出  
兵其郡趙囚邯鄲此不可掩亦已明矣今大王已去千

里之國而制于十里之內矣張韓將北地弓高宿左右

兵不得下壁軍不得太息臣竊哀之願大王孰察焉

文選

張韓謂張羽韓安國弓高侯韓續當昔書作昔者并天下者何也作并天下是何也天下閩吳作天子富

實作實富出軍作出運郊作道臣之所為大王樂為下有以字吞天下之心下有也字六國之從荀悅漢紀

作六國之鋒蘇秦之約作蘇秦之要何也作何則尚得十半作可十得其半魯東海絕吳之饒道作據東海之地絕吳饒道張韓將北地弓高宿左右作張韓之將北地弓高宿衛左右劉攽曰此枚乘說吳王後是後人

以吳事寓言爾故言齊王殺身等事不同又叩笮武帝始通此已云南距羌笮之塞益非師古曰齊王傳吳

楚平齊王乃自殺今此枚乘諫書即已稱之二傳不同當有誤者劉奉世曰按諸傳吳王正月先起兵二月



敗走中間五十日耳三國圍齊三月不能下漢兵至乃引歸解圍而後齊王自殺則當在吳走後一月外事又乘此書云梁固守以待吳飢則是未飢以前安得已知齊王殺身與四國不得出兵及趙囚之詳起乘書非真事後追加之或傳之者增之也

### 七發

楚太子有疾而吳客往問之曰伏聞太子玉體不安亦少間乎太子曰憊謹謝客客因稱曰今時天下安寧四宇和平太子方富于年意者久耽安樂日夜無極邪氣襲逆中若結轡紛屯澹淡噓唏煩醒惕惕怵怵卧不得

瞑虛中重聽惡聞人聲精神越渫百病咸生聰明眩曜  
悅怒不平久執不廢大命乃傾太子宜有是乎太子曰  
謹謝客賴君之力時時有之然未至于是也客曰今夫  
貴人之子必宮居而閨處內有保母外有傅父欲交無  
所飲食則溫淳甘脆醴釀肥厚衣裳則雜暹曼煖燂爍  
熱暑雖有金石之堅猶將銷鑠而挺解也況其在筋骨  
之間乎哉故曰縱耳目之欲恣支體之安者傷血脈之  
和且夫出輿入輦命曰廢痿之機洞房清風命曰寒熱

之媒皓齒蛾眉命曰伐性之斧甘脆肥醲命曰腐腸之藥今太子膚色靡曼四支委隨筋骨挺解血脈淫濯手足情窳越女侍前齊姬奉後往來游醺縱恣乎曲房隱間之中此甘餐毒藥戲猛獸之爪牙也所從來者至深遠淹滯水久而不廢雖令扁鵲治內巫咸治外尚何及哉今如太子之病者獨宜世之君子博見強識承間語事變度易意常無離側以為羽翼淹沈之樂浩蕩之心遁佚之志其奚由至哉太子曰諾病已請事此言客曰

今太子之病可無藥石針灸療而已可以要言妙道  
說而去也不欲聞之乎太子曰僕願聞之客曰龍門之  
桐高百尺而無枝中鬱結之輪菌根扶疏以分離上有  
千仞之峰下臨百丈之谿湍流逝波又澹淡之其根半  
死半生冬則烈風漂霰飛雪之所激也夏則雷霆霹靂  
之所感也朝則鸚黃鳴鳴焉暮則羈雌迷鳥宿焉獨  
鵠晨號乎其上鷓鴣哀鳴翔乎其下於是背秋涉冬使  
琴摯斫斬以為琴野繭之絲以為絃孤子之鈎以為隱

九寡之珥以為約使師堂操暢伯子牙為之歌歌曰麥  
秀蘄兮雉朝飛向虛壑兮背槁槐依絕區兮臨迴溪飛  
鳥聞之翕翼而不能去野獸聞之垂耳而不能行蚊螻  
螻蟻聞之柱喙而不能前此亦天下之至悲也太子能  
強起聽之乎太子曰僕病未能也

客曰犒牛之腴菜以筍蒲肥狗之和冒以山膚楚苗之  
食安胡之飯搏之不解一啜而散於是使伊尹煎熬易  
牙調和熊蹯之臠勺藥之醬薄者之炙鮮鯉之鱠秋黃

之蘇白露之茹蘭英之酒酌以滌口山梁之餐麋豹之胎小飯大獸如湯沃雪此亦天下之至美也太子能強起嘗之乎太子曰僕病未能也

客曰鍾岱之牡齒至之車前似飛鳥後類馭虛穢麥服處躁中煩外羈堅轡附易路於是伯樂相其前王良造父為之御秦缺樓季為之右此兩人者馬佚能止之車覆能起之於是使射千鎰之重爭千里之逐此亦天下之至駿也太子能強起乘之乎太子曰僕病未能也

客曰既登景夷之臺南望荆山北望汝海左江右湖其  
樂無有於是使博辯之士原本山川極命草木比物屬  
事離辭連類浮游覽觀乃下置酒於娛懷之宮連廊四  
注臺城層構紛紜玄綠輦道邪交隍池紆曲潤章白鷺  
孔鳥鷦鷯鸚鵡雛鷓翠鬣紫纓螭龍德牧邕邕羣鳴陽  
魚騰躍奮翼振鱗淑溇蓐蓐蔓草芳苓女桑河柳素葉  
紫莖苗松豫章條上造天梧桐并閭極望成林衆芳芬  
鬱亂於五風從容猗靡消息陽陰列坐縱酒蕩樂娛心

景春佐酒杜連理音滋味雜陳肴糝錯該練色娛目流  
聲悅耳於是乃發激楚之結風揚鄭衛之皓樂使先施  
徵舒陽文段干吳娃閭娵傅子之徒雜裾垂髻目窈心  
與掄流波雜杜若蒙清塵被蘭澤嫵服而御此亦天下  
之靡麗皓侈廣博之樂也太子能強起游乎太子曰僕  
病未能也

客曰將為太子馴騏驎之馬駕飛軫之輿乘牡駿之乘  
右夏服之勁箭左烏號之彫弓游涉乎雲林周馳乎蘭



澤弭節乎江潯掩青蘋逝清風陶陽氣蕩春心逐狡獸  
集輕禽於是極犬馬之才困野獸之足窮相御之智巧  
恐虎豹懼鷙鳥逐馬鳴鑣魚跨麋角履游麇苑蹈踐麋  
鹿汗流沫墜寃伏陵窘無創而死者固足充後乘矣此  
校獵之至壯也太子能強起游乎太子曰僕病未能也  
然陽氣見于眉宇之間侵淫而上幾滿大宅

客見太子有悅色也遂推而進之曰冥火薄天兵車雷  
運旌旗偃蹇羽旄肅紛馳騁角逐慕味爭先徽墨廣博

望之有圻純粹全犧獻之公門太子曰善願復聞之客  
曰未既於是榛林深澤烟雲闇莫兕虎並作毅武孔猛  
袒裼身薄白刃磴磴矛戟交錯收獲掌功賞賜金帛掩  
蘋肆若為牧人席旨酒嘉肴羞魚膾炙以御賓客涌觴  
並起動心驚耳誠必不悔決絕以諾貞信之色形于金  
石高歌陳唱萬歲無斃此真太子之所喜也能強起而  
游乎太子曰僕甚願從直恐為諸大夫累耳然而有起  
色矣

客曰將以八月之望與諸侯遠方交游兄弟並往觀濤  
乎廣陵之曲江至則未見濤之形也徒觀水力之所到  
則卹然足以駭矣觀其所駕軼者所擢拔者所揚汨者  
所溫汾者所滌汜者雖有心畧辭給固未能縷形其所  
由然也恍兮忽兮聊兮慄兮混汨汨兮忽兮慌兮傲兮  
儻兮浩瀟瀟兮起曠曠兮秉意乎南山通望乎東海虹  
洞兮蒼天極慮乎崖溪流攬無窮歸神日母汨乘流而  
下降兮或不知其所止或紛紜其流折兮忽繆往而不

來臨朱汜而遠逝兮中虛煩而益怠莫離散而發曙兮  
內存心而自持於是澡槩胸中灑練五藏澹澈手足顫  
濯髮齒揄棄恬怠輸寫澳濁分決狐疑發皇耳目當是  
之時雖有淹病滯疾猶將伸偃起甕發瞽披聾而觀望  
之也況直眇小煩懣醞醲病酒之徒哉故曰發蒙解惑  
不足以言也太子曰善然則濤何氣哉客曰不記也然  
聞於師曰似神而非者三疾雷聞百里江水逆流海水  
上潮山出內雲日夜不止衍溢漂疾波涌而濤起其始

起也洪淋淋焉若白鷺之下翔其少進也浩浩澹澹如  
素車白馬帷蓋之張其波涌而雲亂擾擾焉如三軍之  
騰裝其旁作而奔起也飄飄焉如輕車之勒兵六駕蛟  
龍附從太白純馳浩蜺前後駱繹顛顛印印据据彊彊  
莘莘將將壁壘重堅沓雜似軍行荀隱匈磕軋盤涌裔  
原不可當觀其兩旁則滂渤怫鬱闇漠感突上擊下律  
有似壯勇之卒突怒而無畏踔壁衝津窮曲隨隈踰岸  
出追遇者死當者壞初發乎或圍之津涯亥軫谷分迴

翔青箴銜枚檀桓弭節伍子之山通厲骨母之場凌赤  
岬篳扶桑橫奔似雷行誠奮厥武如振如怒沌沌渾渾  
狀如奔馬混混庀庀聲如雷鼓發怒崖沓清升踰跽侯  
波奮振合戰于藉藉之口鳥不及飛魚不及迴獸不及  
走紛紛翼翼波涌雲亂蕩取南山背擊北岸覆虧丘陵  
平夷西畔險險戲戲崩壞陂池決勝乃罷滌汨潺湲披  
揚流灑橫暴之極魚鼈失執顛倒偃側沈沈浹浹蒲伏  
連延神物怪疑不可勝言直使人踣焉洄閤悽愴焉此

天下怪異詭觀也太子能強起觀之乎太子曰僕病未能也

客曰將為太子奏方術之士有資畧者若莊周魏牟楊朱墨翟便蜎詹何之倫使之論天下之精微理萬物之是非孔老覽觀孟子籌之萬不失一此亦天下要言妙道也太子豈欲聞之乎於是太子據几而起曰渙乎若

一聽聖人辯士之言怱然汗出霍然病已

文選 四字  
一作四方屯

作沌清風作清宮常作尚唐作盪疏作疎邇作素琴摯作班爾約作弣暢作張伯子牙無子字服處作處服前

後一有後字缺作缺季作秀虞作娛黃作隍鳥作雀苗  
松作松栢閣作栢窕作窕先施作西施邈作遊因野獸  
作困野莫作漢磴磴作磴磴作觸喜作嘉做作個慌  
作趨槩作溉榆作投洪淋淋無洪字沓離作離沓律作  
碑追作埴軒作軫葦作葦凌作陵披揚  
作揚披孟子籌之作孟子持籌而籌之

韓積當

韓王信子信亡入匈奴至積當城生子因名積當孝文時降漢封弓高侯

遺膠西王印書

印齊悼惠王子以平昌侯立

七國之反吳王漢兵敗見誅漢軍至膠西積當遺膠西王書王肉袒叩頭謁漢軍壁積當

出詔書為王讀之王自殺

奉詔誅不義降者赦其罪復故不降者滅之王何處須



以從事

史記 赦其罪漢書作赦除其罪


舞陽侯舍人

告樊他廣不當代後書

樊噲封舞陽侯子伉襲坐呂氏黨誅文帝復封

噲庶子市人是為荒侯子他廣立侯家舍人得罪乃上書下吏奪侯為庶人

荒侯市人病不能為人令其夫人與其弟亂而生他廣  
他廣實非荒侯子不當代後史記



西漢文紀卷七